



La tabla digitala d'infurmaziun mussa il resultat da la votaziun. MAD

Nagin scumond da sa masclar

Il cussegl grond è sa fatschentà cun la revisiun da la lescha da polizia

■ (anr/ac) Il cussegl grond ha desistì cun 61 cunter 53 vuschs dad integrar in scumond da sa masclar en la lescha da polizia grischuna. La maioritad da las deputadas e dals deputads s'ha laschada persvader da la minoritad da la cummissiun e da la regenza grischuna da na stgaffir ina basa legala betg applicabla.

La proposta da scumandar a participants da demonstraziuns lubidas en il chantun Grischun da sa masclar è vegnida da la Partida cristiandemocratica durant la consultaziun. E sia proposta ha pudì persvader ina maioritad entaifer la cummissiun per giustia e segirezza ch'ha integrà in artitgel correspondent en la revisiun da la lescha da polizia dal chantun Grischun tractada dal cussegl grond la gievgia passada. Cunter la veglia da la regenza grischuna che nun aveva stipulà ina tala proposta en sia missiva. Il president da la cummissiun *Reto Cramer* (pcd, Alvagni) ha sco pledader da la maioritad da la cummissiun defendì il scumond e valità el sco impurtant med preventiv cunter caots e demonstrators violents. In scumond che già 14 chantuns hajan introduci. Il deputà *Andri Perl* (ps, Cuira) sco pledader da la minoritad da la cummissiun ha accentuà ses displaschair da la mancanza da pudair s'exprimer en la consultaziun tar ina dumonda da tala impurtanza. Ed insumma na vesa el per il mument nagin basegn per in scumond da sa masclar en il Grischun. El ha fatg attent als onns da grondas demonstraziuns a chaschun dal FEM a Ta-

vau. Gist da quel temp l'entschatta dal nov millenni haja il cussegl grond renvià il scumond da sa masclar. Cun sustegn da divers exponentes da la Partida cristiandemocratica che sajan lura s'exprimids expressivamain cunter il scumond.

Ils burgais han valetà different

Las partidas burgaisas nun èn stadas unidas pertutgant il scumond da sa masclar. Quai ha il chau da la fracziun da la Partida burgais-democratica *Gian Michael* (Schons) concedì per sia fracziun. El n'era medemamain betg cuntent da la mancanza da pudair prender posiziun entaifer la consultaziun. Ses collega da partida *Benno Niggli* (pbd, Aschera) ha pledà per l'integraziun dal scumond en la lescha da polizia sco signal cunter futurs caots. El è vegnì sustegnì da *Mario Salis* (pps, Engiadin'Ota) ch'ha explitgà la situaziun a Turitg ed en auters pajais. *Lorenz Alig* (pld, Foppa) ha medemamain signalisà sustegn per il scumond e menziunà l'incumbensa da stgaffir leschas per il futur. Da tut in auter avis è ses collega da partida *Rudolf Kunz* (pld, Cuira) stà ch'ha avertì il cussegl grond da stgaffir ina lescha che tuts sappian ch'ella na saja la finfinala betg applicabla. Gist ils scumonds en ils auters chantuns mussian ch'il scumond da sa masclar na possia betg mitigiar u schizunt impedir violenza. Da quel avis è medemamain il cusseglier guvernativ e chau dal departament da giustia e polizia, *Christian Rathgeb*. El

ha menziunà l'incarica principala da la polizia dad impedir violenza e donns materials. Ina intervenziun da la polizia en ina demonstraziun pervia dal scumond da sa masclar pudessia gist avair in effect cuntraproductiv e provocar la violenza. Vinavant ha Rathgeb fatg attent a l'environ nua che bleras personas sajan vestgidas cun schals e portian eglers da sulegl. Tenor la lescha pudessian tals demonstrators cuntrafar ad in eventual scumond da sa masclar. La maioritad dal cussegl grond s'ha laschada persvader da la regenza e da la minoritad da la cummissiun e renvià il scumond da sa masclar cun 61 cunter 53 vuschs.

Discrepanza tranter sentiment e realitad

Las discussiuns en il cussegl grond en connex cun la revisiun da la lescha da polizia han mussà ch'il sentiment e la realitad na s'accordan betg adina en dumondas da la segirtad publica. La statistica inditgescha ina digren cuntinuada dad acts chastiabels en Svizra dapi l'onn 2012. Sulet attatgas cunter polizia e forzas da salvament èn creschidas levamain l'onn 2017. In scumond da sa masclar per demonstrators na vul dentant era la polizia sezza betg, era betg la polizia dal pli segir chantun svizzer, il chantun Grischun. Nagina lavur supplementara per la polizia grischuna. Il cussegl grond ha renvià l'introducziun dad in scumond da sa masclar en la lescha da polizia.